



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma : Tir Yimym

tiryimym@aolima

tir yimym

TAPAK 7

BJP den menden melemsatepsü:
Pradyot Debbarma

New Zealand PM ama Hipkins
tezüngzüktep agiogo



VOL. XX NO. 104 (ADOK 104)

DIMAPUR YANGTEPNÜ (THURSDAY)

ANEJETI (JANUARY) 26, 2023

₹ 5.00

NIMSR aser NHAK tsüngta MoU ka zülutep

Dimapur, Aenjeti/January 25 (TYO): Commissioner & Secretary, Health & Family Welfare, Y. Kikheto Sema, IAS ajanga department nung officer aser staff tem shisadokden senden ka January 25, 2023 nü Directorate of Health & Family Welfare (H&FW) indang Conference Hall nung ayongzüka mena liasü.

Iba senden alidang January 6, 2023 nü 10-bedded ICU hospital semzüksü atema anibelem mesasai inyakba asoshi H&FW officer aser staff tem dang pai pelaba shia liasü. Donors aser partner tem den jembiba atema pai officer nem tenüngsang agütsü.

State sorkari nübur ajunga nem health care tajung aser jenjang talangba nung agütsütsü tejangraba lir aser iba atema tarütsü anogotem nunga officer aser staff temi yaritepsüla, ta Sema-i ajungshia liasü.

Pai ashiba agi, Medical College, Kohima indang Administrative building ya 2023 küm May ita matongdang renemtsü, tetsür aser tebur hostel tem April 2023 matongdang renemtsü, Sports complex ya February 2023 tashinung renemtsü, Dean, Director aser staff tem indang quarter terenemlen lir aser library aser teachers common room June 2023 tashinung renemtsü.

Iba medical college ya taküm academic session metembangdang tenzüksü, ta pai temolung lemteta ashi.

Meta talang nung alirtem nem health care agütsütsü asoshi 10-bedded ICU hospital amenok aser sorkari tanünga district tem nung ano ICUs pezü amenoktsü sentong lir, ta pai

ashi. Asen state nung terenlok lenmang balala liaka World Bank aser JICA ama danga investor teyari nüngdaker aser ibaji ajanga asen health care system tali tashi itshitsü, ta ashi.

Awareness campaign aser sentong balala indang jembidang Sema-i ashiba agi, state nung moko dak sendakba cancer tali adoker asünung moko indang awareness sentong nüngdaker. Item campaign asoshi program officer temi Central Ministry den osang agitepa alitsüla, ta ashi.

Iba sentong nung "Tobacco Free Pledge" agi Directorate of H&FW, Health Centres, District Hospitals, Primary Health Centres, sub-centers, Chief Medical Officer offices, aser Medical Superintendent Offices tem "Tobacco Free Zone" sangdonga liasü.

Kasa senden nung NIMSR atema NHAK ya teaching hospital ka kumdaktsütsü asoshi Nagaland Institute of Medical Science and Research (NIMSR) aser NHAK tsüngta Memorandum of Understanding (MoU) ka zülutepa liasü, kong Y. Kikheto Sema, IAS, Commissioner & Secretary, H&FW aser Dr. Temjentsungla, Principal Director, H&FW dena liasü.

Iba senden nung Dr. Temjentsungla, Principal Director, H&FW ajanga tarur pela agizükba o jembiba aser Dr. Vibeitounou Mepfuo, Managing Director, NHAK ajanga melepzüng o jembiba liasü.

Maneni iba senden nung Dir. Prof. Dr. Soumya Chakraborty Director cum Dean, Nagaland Institute of Medical Sciences and Research (NIMSR) ajanga o tatsüka jembiba.

Doctor tem NPA agia private hospital nung meinyaktsüla: Kikheto Sema

Kohima, Aenjeti/January 25 (TYO): Non-Practicing Allowance (NPA) indang sen agia in-service government doctor tem private hospital nung mapa meinyaktsüla, ta Commissioner & Secretary, Health & Family Welfare, Y. Kikheto Sema-i ashi.

Government doctor tem nung NPA agütsüba ya state nung sorkar department tila ter nung inyaker itasen dang tali lir, ta Sema-i Directorate of Health & Family Welfare indang ketdangsür den senden ka amending ashi.

Sorkari shimba doctor tem government hospital nung bendanga agütsür inyaktsü

memolungi private hospital nung inyaka sen aazüker mapa nungi anisüngzüük agüja parnok melen unemployed qualified doctor tem shimtsü molunga lir, ta pai sashi-sashia ashi.

Pai Directorate of HFW aser Nagaland In-service Doctors Association (NIDA) dang iba amala doctor tem metettsü mepishia liasü.

"NPA agia private hospital nung inyakba doctor tem mapa nungi anisüngzüük agütsütsü nungnanga malitsü," ta pai ashi.

Health centre 772 atema doctor 548 agüja lir aser department ya shidakba nung technical asütsüla aser technical staff timba alitsüla saka technical

staff shilem 34 aser non-technical staff shilem 64 lir, anungji grade IV aser III nung nisung 9000 dak tema lir, ta pai ashi.

Grade-IV staff shimba ya talisa ali kibur mechi lir, aser ali kibur nütsüng ya mozüki ka nung temang anepalua alirtem dang kanga agi timba lir aser government school ka nung azünger dang yangji ali kibur timba lir, ta Sema-i ashi.

Directorate of HFW nung attach süa aliba ketdangsür shirnok tajungtiba rongnung tajungtiba lir, parnok administrative building nung mener mapang meindoki yimdak yimtsüng nun goa shiranger anepalutsü ayongzüka liasü.

Nagaland nung AAP kimong mesemer

Kohima, Aenjeti/January 25 (TYO): Nagaland nung January 25, 2023 nü Aam Aadmi Party (AAP) kimong mesema state unit tir ka ama taoba MLA Asu Keyho shima liasü.

Iba osang ya AAP North East in-charge Rajesh Sharma-i Hotel 2K nung osangbener senden ka nung sangdonga liasü.

"Shisaliok tajung, healthcare tajung, lenmang tajung aser ki-o-jen ama nüburtem asoshi shidakba tebilemstü tang tashi takok monguteti lir aser tang tashi asenok 'developing nation' ka lir aser AAP lenir Arwind Kejriwal-i India ya alima nung tematiba kumdaktsütsü asoshi mission ka tenzüko," ta pai ashi.

Nagaland nunga item tebilemstü ya lir, kechiaser terenlok peria maliba den ochimashi ajanga item timtem ya lenmang, healthcare system aser school tem nung jangja ajiteter, ta ashi.

"Asenoki item ya melentsü nüngdaker aser sorkar tajung atema vote agütsütsü mapang

tetemsü Nagaland nung aliba nüburtem asoshi aruogo. Ochishia yimsü asütsü atema vote agüjang, state nung ajaklen terenlok asoshi vote agüjang aser yimtenren aser sorkar nungi ochimashi samadakjang," ta Sharma-i ashi.

AAP Nagaland tir ka ama inyaktsü Keyho shimba sangdong dang, Nagaland nung nüngdakba temelenshi bener arutsü asoshi party tashi itshitsü aser grassroots tashi alutsü imlaba pai lemsatepa liasü.

"Terenlok alitsü aser ochimashi samadaktsütsü bilemer ajaki state nung AAP den teka amtepsüla," ta pai ashi.

Sharma-i ashiba agi, küm ter nung AAP sorkar Delhi aser Punjab nung lir aser ano Gujarat aser Goa nunga MLA tem lir aser ano Assam densema state balala nung elected council aser local body nunga lir.

"Nagaland nung aliba nüburtemi onok pela agizüktsü imlar. Party-i tebilemba tajung aliba candidate bushir aser lanur

aser tetsürtemi tejakleni arura akok tashi timtiba menden nung toktepsü renema lir."

AAP-i pre-poll alliance meyanglutsü, ta paisa metetdaksü.

Tekeratiba nung tir tasenba aser linük nung lenirtemi anir Coordination Committee ka tentettsü aser parnoki candidate tem shimtsü aser ano AAP Nagaland indang ketdangsürtem sangdongtsü, ta Sharma-i ashi.

Keyho-i tir mapa agizüka jembidang, AAP yagi nüburtem ajangzüksü atema sorkar tajung yangerteta lir, ta ashi.

"Delhi nung azünger aser mapa inyaker asen Naga nungeri sorkar tajung aser nangzüka ama inyakba nguogo. Nagaland nunga iba party ya bener arua sorkar tajung kumteta nübur nem tajangzüük agütsütsü nüngdak ta yongya liasü," ta pai ashi.

Nagaland election tonga arur aser party principle nung aliba ama inyaktsü jangra aliba nüburtem asoshi AAP kishi lapoka lir, ta ashi.

(Maneni tapak 2 nung...)

Naga nungeri tamachi mapa inyaker: K. Therie

Dimapur, Aenjeti/January 25 (TYO): Candidate aika village election committee temi len anir. Ibai tesayur ka dang kaketshiri sayuba mesüra professor tem kecha memetet kaketshir kati len aniba mesüka lir. Nagaland nung aika jakdang aliba tesemtem nung junga meshisadanga teloki lemtetba nem len anidaktsür. MLA tem shimteter aser parnok mapa ajak agi sen auyatsü aser vote alitsü lir, ta NPCC tir K. Therie-i sangdong ka nung ashi.

2018 küm NDPP yimymji "Change is coming" liasü. Asen lenmang nung kari danga temelenshi ngua lir asü? Power supply tajungba kuma melenshiba kari ajiteta lir na? Tajemtsü tzü agütsüba tajungba kumer asü? Asen kakete reju tem tajungba kumer na? Asenok Medical College ngur na? Küm 30 dak tema yangluba Outdoor Stadium kari danga ngur asü? NDPP ajanga nüburtem ashiokja arur saka nüburtemi odang meim, ta pai ashi.

(Maneni tapak 2 nung...)

21 Tuli Assembly Constituency nung Hon'ble MLA Amenba Yaden yaritsü bangjemmer



Molungyimsen, Luyong aser Merangkong yimtem nungi lanurtem telongjem senden sentong ka lia tang agitsü aliba election nung 21 Tuli Assembly Constituency nungi Hon'ble MLA Amenba Yaden yaritsü asoshi bangjemogo. Iba sentong nung tesüsa Longhapang, Merangkong nung nüboritem senden ka nung taoba candidate Wb.Lipokmar Tzüdiri anir Molungyimsen aser Luyong yimtak nungi nisung 200 dak tali aruagi Merangkong lanurtem den shisalemsatepa liasü.

BJP ticket menguaka election-i aitsü renema lir: Toshipokba Ex. MLA

~ Sashimeren Jamir

Mokokchung, 25th JAN (TYO): Bharatiya Janata Party ticket anguyonga manguyonga, aruya aliba 14 buba Nagaland Legislative Assembly election nungji aitsü renema lir, ta taoba 26 Aonglenden MLA, Toshipokba-i iba osangbener den jembidang metetdaksü.

“Aruya aliba election nungji O. Tinu Lkr küna külemi lungjemer noktaksü lemtetogo”, ta pai ashi. “26 Aonglenden tejakleni bener aotsü nüklana nung aser nüburttem taginüba atalokdaksütsü aser temelenshi bener arutsü asoshi küna ka küma lungjemtsü telemtetba agiogo”, ta paisa shisem. O. Tinu Lkr ya taoba NLA Deputy Speaker, MLA & Advisor, Lt. Imtikumzuk Longkumer tenu lir.

Iba osangbeneri Toshipokba dang, “naia NDPP-BJP 40:20 seat sharing formula ya junger majung ama bilemer?” ta metetnua asüngdangdang, “menden lemsatepba ya kanga majung, kechiaser tang tensa tia asadagra, BJP kisüngia single majority nguteta sorkar kümtetsü tashi lir, anungji, ibai salatsüla”, ta ashi. Taoba mapang ama masü, “Nagaland nung BJP ya nüburttem kanga sabuba party ka kümogo, anungji, constituency 60 nung aitsüsa nübu peria lir”, ta paisa



Toshipokba Ex. MLA

shisem.

“Temelenshi kecha mekai 40:20 seat sharing formula nungji dang ora, Nagaland nung BJP sama-a aotsü menua mali, anungji, tang nüburttemi BJP sabuba mapang iba maongkaji agitsüla aser nüburttemi angadangsüla”, ta Toshipokba ashi.

2022 October nung BJP nung dener inyaka arudang, 26 Aonglenden A/C nung voters 13000 shi lir, aser item rongnung voters 7000 shi bo BJP nung tenüng züluokogo, aji oda, “BJP-i takoker candidate ka bushir asünungbo, takok angutsüba tejangja, anungji, 26 Aonglenden AC nung ticket ji kü nem agütsütsü tim”, ta paisa tebilemba kar lemsatep.

Iba osangbenerisa pa dang “kechi tangatetba nung na BJP nung aden?”, ta asüngdangdang, BJP-i aniba sorkar yagi grass root nüburttem

atema sentong tajung aika tenzüka ya jangratemtsüka lir aser talisa India Prime Minister Modi-i North-East atema temulung kanga agütsüba angur, iyongji iba party dak tarutsü nüklana lir, ta ajiteta BJP nung aden, ta pai langzü.

Nüburttem tejangraba nung Aonglenden A/C nung joko 4-5 tashi election nung shilem agia arur saka MLA term kata abensaa meinyakdang. “Aonglenden nüburttem den joko küm talangka lisema arur asünung, constituency tiaji kanga junga meteta lir, anungji, constituency sanger atema mangdang tulu lir”, ta ashi.

“Ni election-i aiba ya takar-tulur kümnüba mesüra konang aginüba agi masü, saka nüburttem tejangraba tulu nung noktaksü mulungtetogo, anungji, nüburttemi maneni sarasadema atadaksünür”, ta paisa mepishia metetdaksü.

Taoba MLA, Toshipokba ya 2011 by-election nung pai taoba Nagaland CM & Governor, Dr. SC Jamir tsükdaksü aser MLA ita 18 dang inyaka. Aji sür, 2013 & 2018 nung toktep, saka madok. 2018 küm tia maka ajurua Imtikumzuk iba lima nungi pila, iyongji 2019 küm by-election agiba Sharingain Longkumer (NDPP)-i Alemjongshi Longkumer (INC) madak takok angu.

Health & Family Welfare Dept-i tetuyuba agütsür

Dimapur, Aenjeti/January 25 (TYO): Department of Health & Family Welfare-i, Cigarettes and other tobacco products (Prohibition of Advertisement and Regulation of Trade and Commerce) Acts 2003, Section 4 & 6 (b) ajanga lokti adenshiba tesemtem nung moko machitsü aser educational institution telongtet meter 100 nung moko agi yangluba osettem mayoktsü atema tenokdangba agütsür lir, ta metetdaksü.

Department-isa, Health Center tem ya lokti adenshiba tesem küboki aiter aser Health Centers tem ya tangazükba tesem ama züngshir asünung, educational institution küboki aiter aser Act kübok Provision

balala anema inyakertem temzüng ozüng kübok merenshitsu, ta metetdaksü.

Cigarettes and other Tobacco products (Prohibition of advertisement and Regulation of Trade and Commerce, Production, Supply, and Distribution) Acts 2003 kübok Section 4 & 6 kübok tashi agüja aliba dak ajemdaker aser moko agi yangluba oset amshiba ajanga tashidak balala adokba temulungdang yur state sorkari District Hospitals(DH), Community Health Centers(CHC), Primary Health Centers(PHC), Sub-Centers(SC), Chief Medical Officer(CMO) offices, Medical Superintendent(MS) offices, Naga Hospital Authority

Kohima (NHAK) aser Directorate of Health & Family Welfare ya Tobacco-Free Zone ta sangdongogo, anungji mozükitem telongtet nung moko achiba aser moko agi yangluba osettem mozüki telongtet meter 100 tsüngdang ayokba tenokdangba agütsür. Iba tetuyuba ya February 1, 2023 nungi benoka inyaksangshitsu, ta kasa sangdong ajanga metetdaksüogo.

COTPA 2003 kübok Section 4 & 6 (b) nung aibelenertem anema jenjang tapet agitsü asoshi Principal Director, Heads of Offices in charge of Hospitals ajak, CMOs, MS aser Nursing-in-charge tem nem tashi agütsür, ta Department-isa metetdaksü.

Mkg nung 13buba National Voters Day anogomung mungogo

Dimapur, Aenjeti/January 25 (TYO): 13buba National Voters Day anogomung January 25 nü DC Conference Hall, Mokokchung nung 'Nothing like voting, I vote for sure' omen nung ajemdaker sentong ka agiogo. Iba sentong nung Deputy Commissioner & District Election Officer, mokokchung, Shashank Pratap Singh IAS alaketa jaoker liasü.

Sentepa aliba lokti den o jembiba mapang Deputy Commissioner-i, iba anogo ya voter ajak aser talisa PwD voter aser tang mezüngbuba vote agütsütsüpertem atema

tongtibang lir, ta ashi. Paisa, BLO/Supervisors aser stakeholder ajak dang district nung election agiba jenjang tali tajungba küma ajungkettsü atema merekmeraka agitsü ayongzüka liasü.

Pai, PwD voter tem ken o asadangshiba aser polling station tem nung parnok atema facility balala agütsüba indang jembiba liasü. Pai voter ajak dang pei tangatetba nungi masetshi tanga akümtsüba vote agütsütsü ayongzü.

Iba sentong nung Addl. Deputy Commissioner & ERO mokokchung, Chumlamo

Humtsoe-i lokti pela agizükba o jembiba, Supongsangla Jamir, PwD ICON Mkg-i ken ka aten aser Mokokchung Disable Forum tir Imkongnungchet Kichu-i o tatsüka jembiba liasü. Iba sentong ya Assistant Election Officer, Mokokchung, Renben Mozhui lenisüba nung agi aser EAC, Mokokchung Zerutso Kesizie-i tepela o jembiba liasü.

Sentong ayongzüka agiba mapang Best BLO Award agütsü aser voter tasentem nem tetushi agütsüba den ADC & ERO Mokokchung-i achayanga voter tem tenangzüktepba agia liasü.

TEACHERS WANTED

Sl No	Subject	Qualification
1	Maths	M.Sc / B.Sc
2	Science	M.Sc / B.Sc
3	English	MA / BA (English)
4	Hindi	Hindi Graduate (Ratna 2) with 10+2 (Hindi/English medium) to teach up to Grade 8.
5	Computer	BCA or O Level (1 year Advance Diploma) Must have sound knowledge in Microsoft Applications, HTML and basic programming languages
6	Asst Teacher	MA / BA

Interested candidates may mail togreenhillsacademy@gmail.com or WhatsApp in 7642028118

Chief Electoral Officer-i MCC indang metetdaksü

Dimapur, Aenjeti/January 25 (TYO): Chief Electoral Officer office sangdong ka ajanga Election Commission of India (ECI)-i January 18 nü Nagaland Legislative Assembly 2023 General Election indang mapanglem sangdongba dak ajemdaker state ajunga nung Model Code of Conduct (MCC) benokogo, ta metetdaksü.

Anungji ken o dak sendaka alir ajak dang MCC aser Election Expenditure Monitoring (EEM) dak sendakba nung ECI-i agütsüba tongtibang guidelines tem sülen anidaksü atema metetdaksüogo.

Tetuyuba tem rongnung;

Defacement of property, official gari mamshitsu yimya nung amshiba, sorkar Dak Bungalows/Rest houses mashiymi amshiba, Schemes/Project tem, Electoral agilen aser ochi mashi inyakyimtem, Pre-Certification of Political Advertisements, Mechanism for monitoring Election Expenditure, pamphlets, posters amala menüngba nung tenokdangbatem, senotsü bener mesenzütsü atema tenokdangba agütsüba, Monitoring by Banks and Income Tax Departments aser Complaint Monitoring System densema lir.

Naga nungeri tamachi mapa... (TAPAK 1 NUNGI...)

Asen yimti aser jila tem menena akumer. Asen lenmang nung mongpu mapang aoyi adoker aser meyi nung motzü akumer. Asen power supply tamajungtiba. Kohima aser Dimapur nung tzü supply maka. Nüburttem asoshi tongtipang ki-o-jen tem jenjang tamajungtiba nung lir. Lenmang indang asüngdangba mapang Governor kati, "lenmang mali" ta langzüa liasü. Niti-Aayog ajanga Nagaland state ya 'worst performing state' ta nungja agütsü. Saka nüburttemi meimer, ta Therie-i ashi.

Ozüng agi melaba ama masü mapa nung nübu shimokba, kinunger adianu atema kisüng bilemba, bensa amshiba ya yimya ka dang kümogo. Iba sorkar ya külen dang. BJP aser Alliance temi opposition voter tem nüburttem senpong nung shilem mali ama bilemer. Tax ya ruling voters kisüng masü saka ajaki agütsüba ta parnoki mangateter,

ta ashi.

RSS aser BJP ajanga solution anema, Khristanpur, Muslim aser Jain nunger anema inyakba ya ajaki meteta lir. Molungteba aliba solution mapa kuma inyaksü mapang atsülangba aser ochimashi maparen ajak ya NDPP khuret lir. Nüburttem ola senzüka yutsü aser Nagaland nung aliba nüburttem mezüngmeshi. Ajisüaka ticket bushirtem meimer, ta pai ashi.

Nagaland Joint Christian Forum ajanga Clean Election Campaign tenzü. Parnoki election ya temenen aser ochimashi tenzüker ta angatet. Election kanga menena akumba ajanga Clean Election Campaign tenzü.

BJP aser NDPP alliance-i takok mongutetba aser lendong aketba yimya amshiaka aikati BJP aser NDPP ticket bushir. Ibai tamachi wara ka lir aser iba wara aneptsü mozü maka, ta Therie-isa ashi.

Nagaland nung AAP kimong... (TAPAK 1 NUNGI...)

"Nagaland asoshi AAP-i imlaba ama süoki ia inyaksü. Nagaland nung AAP tera yanga tarutsü putu asoshi nüklana aser teimla tasen ka agütsütsü," ta pai ashi.

State atema party agenda indang jembiba mapang, state nung Hornbill benjongmung ya paidoktsü makokba sentong ka kuma Naga nunger ka ozü ka külemer ama sayur aser AAP-i iba hornbill amshiba indoktsü tebilemba lir, ta pai ashi.

Ano merit oriented competitive exam ka amenoktsüla, aser yangji marking system ya written atema 80, academic excellence atema 10 aser interview/viva voice system atema 10 alitsüla, anungjidang zünger mapa mangu aliba lanurtem sorkar mapa angütsü maongka shidak agütsütsü, ta pai ashi.

AAP headquarters ya Kohima nung alitsü, ta Keyho-i metetdaksü.

PM Modi aser Egypt Tir Sisi na senden amen; tezüngzüktep kar agi

New Delhi, Aenjeti/January 25 (Agencies): Bodhbarnü India aser Egypt nati linük ana tsüngda tesendaktep ya asalentong tesendaktep-i ajungkettsü telemteba agiba den külemi yimtenren, security, defence, energy aser rongsenkettsüng sectors nung tezüngzüktep agiogo.

Linük anatisa cyber security, sobaliba, information technology & broadcasting tsütsü linük ana tsüngda amalitepa inyaksü atema tezüngzüktep agiogo, ta Ministry of External Affairs (MEA) sangdong ka ajanga metetdaksü.

Linük ana tsüngda tezüngzüktep agibaji Ato kilonser, Narendra Modi aser Egypt Tir, Abdel Fattah El-Sisi nati kulisüa liasü, ta MEA sangdong nung shia lir.

India aser Egypt na tsüngda tesendaktep yangluba sülen taküm küm 75 ajungba

nüngtem nung commemorative postage stamps sayaogo, ta MEA sangdong ajanga metetdaksü. Iba dak alia Indian Computer Emergency Response Team aser Egyptian Computer Emergency Readiness Team na tsüngda cyber security atema tezüngzüktep ka agi.

Union Minister of Communication & Electronics and Information Technology, Ashwini Vaishnaw aser Egypt Minister of Communications & Information Technology, Dr Amr Ahmed Samih Talaat nati linük ana tsüngda Information Technology tsütsü tezüngzüktep agi. Union Minister of Culture, Tourism, and Development of North Eastern region, G Kishan Reddy aser Egypt Minister of Foreign Affairs, Sameh Hassan Shoukry nati linük ana tsüngda sobaliba tsütsü amalitepa alitsü atema tezüngzüktep agi.

Bodhbarnep Egypt Tir, El-Sisi-i New Delhi nung aliba Hyderabad House nung Ato kilonser, Modi ajurua liasü, iba sülen tena leniba nung linük ana nungi ketdangsertem senden mena linük ana tsüngda onüktem, regional aser international onüktem nung o lemtepa liasü.

Egypt aser India nati lanurtem dak sendakba onük balala nung amalitepa inyaksü atema tezüngzüktep agiogo. Iba dak alia India nung Prasar Bharati aser Egypt nung National Media Authority na tsüngda Broadcasting tsütsü amalitepa inyaksü atema tezüngzüktep agi.

Bodhbarnep Egypt Tir, El-Sisi-i New Delhi nung aliba Hyderabad House nung Ato kilonser, Modi ajurua liasü, iba sülen tena leniba nung linük ana nungi ketdangsertem senden mena linük ana tsüngda onüktem, regional aser international onüktem nung o lemtepa liasü.

India nung 74buba Republic Day nung tongti tejaokerji Egypt Tir, Sisi lir.

Senden tembangba sülen lenir ana- Modi aser Sisi nati külem sangdong ka ajanga, senden nung jembiba onüktem metetdaksü.

Republic Day nü Police 901 nem medals agütsütsü



New Delhi, January 25 (Agencies): India nung 74buba Republic Day anogomong nung CAPFs aser state forces nungi police 901 nem medals agütsütsü, item rongnung Police Medal for Gallantry (PMG) 140 densema lir, ta Bodhbarnü Union home ministry-i metetdaksü.

Tasü aitba awards agizüker teimtibaji Left Wing Extremism (LWE) mesüra Maoists telungpurtemi timtem agütsüba state tem nungi sepai 80-i angütsü aser Jammu & Kashmir region nung aliba sepai 45-ia iba medal agizütsü, ta ministry of home affairs (MHA)-i metetdaksü.

India nung paramilitary sepai tulutiba- Central Reserve Police Force (CRPF) nungi nisung 48-

i Police Medal for Gallantry (PMG) angütsü, Maharashtra nungi police 31-i PMG agizütsü, Jammu & Kashmir nungi police 25-i PMG agizütsü, Jharkhand nungi Police 9, Delhi nungi Police tenet, Chhattisgarh nungia Police tenet aser Border Security Force (BSF) nungia sepai teneti iba medal agizütsü, ta MEA sangdong nung shia lir.

Takumbo tasü aitba award rongnung temaba- President's Police Medal for Gallantry (PPMG) shinga nem-a magütsür, ta MEA-i metetdaksü.

Police 93 nem President's Police Medal for Distinguished Service (PPM) aser police 668 nem Police Medal for Meritorious Service (PM) agütsütsü.

74th Republic Day

Salem Senso Ajak Den Lemsateper

Jai Hind

Kartavya Path nung Republic Day benjung amongba anepdang 9:00 ako nungi Doordarshan network nung 'live' sayutsü

Republic Day nü aluyimertem Union SKM-i longkak aittsü

New Delhi, Aenjeti/January 25 (Agencies): Bodhbarnü linük nung agitsü, tetsüng agi jajatsü aluyimertem union balalai aser senden amentsü," ta tentetba Samyukt Kisan SKM-i metetdaksü. Morcha (SKM)-i, Republic Day anogomong nung state tractor rallies aser senden amentsü," ta tentetba Samyukt Kisan SKM-i metetdaksü.

Republic Day nungsa aluyimertemi yakümba agütsütsü," ta SKM-i Centre sorkari benokba aluyimba ozüng tasen asem anema longkak aittsü aser Haryana kübok Jind nung lokti senden alitsü, ta metetdaksü.

"Samyukt Kisan Morcha-i ayongzükba kübok January 26 nü Republic Day anogomong nung linük tesem ajaklen aluyimertem



2021 küm Lakhimpur nung aluyimertem menüngsetba ken o nung tai tonglokja alir tongti, Ashish Mishra Lakhimpur nung aliba court kati anir aoba noksa nung angur. Iba ken o nung Bodhbarnü Supreme Court-i pa nem hopta 8 interim bail agütsüogo.



TIR YIMYIM YIMOBILEM (EDITORIAL)

DIMAPUR YANGTEPNÜ, AENJETI (JANUARY) 26, 2022

Kechiba January 26 ?

India nunger British yimten talenba kübok nüchibo 1947 küm August 15 nü angu saka linük temzüng yangludang küm anasemka agir, 1950 küm January 26 nü nungi dang temzüng mapa küma amshia aotsü tenzük. Iba anogo nungi tanü tashi nung India temzüng mapa küma amshi tenzük küm 74 ajungba anogomung tanü amonger. Atangji, linük temzüng ya tatar senden nungbo 1949 küm November 26 nü lateta ayu, ajisüaka temzüng mapa küma amshitsü tenzükba anogobo January 26 ang agibaji India yimten nüchiso raraba maparen nung otsü talangka lir. Naga nunger tang tashi yimten nüchiso shitakbabo mangu saka 1947 küm August 14 nü asenoksasa asenok yimten nüchiso nguogo ta sangdongba ama, India nungertema yimten nüchiso atema British nungertem den raradang, parnoksa 1930 küm January 26 nü India yimten nüchiso nguogo ta sangdong. Iba jakdang, Mahatma Gandhii anir India yimten nüchiso asoshi tashiyim mamshii raraba sentong aika ayongzüka inyak saka takok mangu. Iba ama mapang ka nung, India nunger lanur tazünger aser tashitemeteterem rongnung Indian National Congress nung tongti shilem agitsüsa Jawaharlal Nehru, Subhash Chandra Bose, Vallabhai Patel aser C.Rajagopalachari nungertem adoka India yimten nüchiso asoshi raraba maparen nung lenisüba tasen agüja tashi itshitsü tenzük. Item lenirtemi anir India yimten nüchiso asoshi nokdakba tongpang tesashiba aküm nungji, British yimtenia mareteti India nung yimten yimsüsübaren yanglushitsü atema nisung tenet agi akümba Commission ka Sir John Simon-i anir shimtet. Ibayongji iba telok dang Simon Commission ta aja. Ajisüaka, India nungertemi India nung yimten yimsüsübaren yanglushitsü atema British nunger kati anir Commission ka shimbaji magizük, kechiyong parnoki British yimli kübok yimten yimsüsübaren yanglushitsüba atema masü saka bendanger yimli kübok kenyongi malitsüsa yimten nüchiso jenjang ka asoshi nokdak. Iba jagi linük ajaklen Simon Commission anema nübortem rongga atu aser Simon Commission meyipa oang ta ayimten. Atangji, asenok Naga nunger asoshibo Simon Commission ya yimten nung kanga tongtibangsa tetshir, kechiyong mezüng Naga yimten nüchiso jenjang ka asoshi temeten shia tezüluba nung agütsüabajibo Simon Commission ya liasü. Ajisüaka, India nungi parnok ya temeindoker amai meindoker, parnok melen India National Congress-i Motilal Nehru-i anir Commission ka shim. Iba Nehru Commission yagia India ya British den külemi alitsü saka yimten tashi balala asütsüsa 'Dominion status' nung alitsü renema bener aru. Iba kasa Dominion status-ji 1926 küm Canada, Australia aser New Zealand nem agütsür liasü. Ajisüaka, Motilal Nehru'er jabaso Jawaharlal Nehru-i dena tebuti bener aruba tebilembaji magizüktet, kechiyong ibaji India asoshi yimten nüchiso anguba jenjang ka masü asü. Aji oda, Jawaharlal Nehru aser Subhash Chandra Bose nungertemi anir India asoshi Dominion status-ji menüngdak saka British yimten den kecha tesendaktep mali bendangbendanga India yimten nüchiso angutsüla ta kanga sashia nokdak. Iba tashi nung Mahatma Gandhi-ibo Dominion status nungji ajemdaker yimten nüchiso atemaji maneni inyaka otettsü ta tangatetba liasü. Ibayongji, 1929 küm Viceroy Irwin-ibo India nem Dominion status agütsütsü ta sangdong saka idangjibo India nungertemi masü British nungertemiang magizüktet, kechiyong British nungertemi parnok ket nungi India-ji kenyongi mechioknü. Iba jagi Irwin-isa pai jembiba o ji meyipa agia adok. Iba jagi India nunger lenirtem tali jashidaksü aser 1929 küm India National Congress teloki "Poorna Swaraj" tetezü yimten nüchiso nguogo ta sangdong aser 1930 küm January 26 nü Indian National Congress lenirtemi India nungertem dang yimten nüchiso anguba asoshi pelateptsü osang sangdong. Iba kasa anogo nung tanü amshiba India wako ya yimzudaksü. Aji oda, iba anogo nung jagi 1947 küm tashi January 26 ya India nunger asoshi yimten nüchiso anguba anogo ka ama monga liasü. Ibayongji, India temzüng mapa küma amshi tenzükba anogoa January 26 kümdaksür tanü amonger. India nunger iba anogomung amongdang, asenok Naga nungertema yimten nüchiso asoshi raraa arur, 1947 küm August 14 anogo nung yimten nüchiso anguba osang sangdongba bilemteter.

OLEMSABANG

KONGYIMJUNGLIR IDAKJI TERELOKALITSÜ

~ L. Kika Pongener.

Alima nung nüburrr ajaki yimjung nung sünepa linur, koba linük nung nüburrrtem longjema meimtepa yimjung nung lidir, iba linükji lenla ajak nung renloka tejakleni aotsü. Koba linük nung telongjem aser temeim agi süngaa lidir, iba linük nungji yimchi-yimjung, azükaro alitsü aser kechisarena ajak nung takok angutsü. Koba lima nung nüburrr longjema yimjung nung lidir, iba lima nungjagi alima lenitsü lanur watsü wabong tajung sotettsü aser asdoktsü. Asenoki tanü asenok aliba lima tia reprangdangra kanga tesasatsüka, alima aika nung rara agi süngaa lir, loktiliba aika mepetmesu aser telemsa agi süngaa lir. Linük ka yimjung nung sünepa alitsüba yimsusur aser lokti lenirtem dak tulu ka keta lir. Linük ka longjema yimjung nung sünepa alitsü atema temzüng-ozüng tesashi agi alenba aser merenshiba agi masü, saka nüburrrtemi yimsusur aser lenirtem den amalitepa aliba, yimsusur aser lenir sulen tashi angaa anidakba, shisa tajung aguja ajungshitepba aser longjema aliba ajanga dang linük kaji yimjung nung sünepa alitsü. Ano yimden yimsusur aser lokti lenirtem-ia nüburrr ola angaa, nüburrr taginuba angateta, nüburrr nem pei temeden ashitsü sabang sadem-sadema lapokja yimsu asüba/len-aniba ajanga dang linük kaji sünepa yimjung nung alitsü. Temzüng-ozüng tesashi agi alenba aser merenshiba agibo tema tereprangtsü dang longjemtsü, saka telung nungbo zübo tulu keta yirutsütsü, aser iba yiruba tarakji putu aika mesamatsü. Laishiba nung zünga, Solomon-er jabaso Rehobom-i tambur shisa tajung agutsürtem nungi masü, saka lanur tetoktak nisüngatemi shisatsü tamajung agutsüba agir yimsu asüba agi Israel yimli ana küma lemsa. Kechiyong lanurtem jagibo tashiyim agi merenshitsü aser taochi mekai inyaktsü aji dang jangratsü, saka tashiyim agi kodanga linük ka meyanglutettsü. Alima otsü nung züngdangra, chuba shirnoki tashiyim agi yimsu asü, item chubatemji tansutsü-ka taküm tempangba angutsü. Rom yimli nung Nero chuba shibai khristantem taochi mekai reshikangshi, pa tansutsü-ka mesen agi ruseta asüba otsü lir. Küm ishika suiogo, asenoki tenuki ngua Iraq lima nung President Sadem Hussain taküm koda tembang (?) Ano Afghanistan lima nunga lenir Osama Bin Laden taküm koda tembang (?) Aji oda, alima chubatemji nüburrrtemi akümtsübuttsüsa (Respect) yimsu asütsüla, saka asükshijang meronga tsübuttsüsa (Fear) yimsu sura iba chuba yimlij arishia nokdaka malitsü. Aji oda, yimtsüng tilatiba ka nung yimden yimsusurtem-ia tanü ni ataa azüngerji, mesura loktiliba ka nung lenirtem-ia tanü ni ataa atongokerji...ta ser tangar tenuk agi mangu, taochi maket, tashiyim agi yimsu sura aser anira, iba yimsusuba bangdak aser loktiji talangka moi laoa-adoktsü. Atangji, koba linük nung teti arishitepa, tsükchitepa, lemsar dang lidir iba lima nungjagi lanur tajung alima lenir, watsü-wabong, kenshi-oshir kodanga madoktsü, kechiyong nüburrr tsüngda nukmeremtepba, tsükchitepba, arishitepba, ibala shisatsüji tanür ka tainlonglong mapang nungi parnok tokolok shisatsü aser mulungsentsü nung keter aintsü. Atangji iba ama linük nungjagi sotetba/intetba lanurtemji alima atema lendong aketba, lokti raksatsür, kira-longrar, tetsübuttsü nisünga asütsü. Anungji nüburrr ajaki angatettsüba, yimtsüng ka/lokta ka raksar aliba yanglutsü atema, akokba tashi agi tai-temeden kanga arok-aroka mebushitepi, kodaser ajak tetsükdaksü kecha mekai longjemtettsü/aittettsü iba lenmangji dang bushitsüla. Yimsusur aser lenir-i anir nüburrr ajaki yimtsüng/lokta ka raksaba aser telemsa adokba ken-scu, o-scu aser khuretji aseni mabentsüsa/asen dak mekaotsüsa, mesura asen chirnur/semchisemnur dak matutsüsa/mekaotsüsa ochi aser mulungsentsü teindang agi jembitsüla aser inyaktsüla. Aji oda, alima aser lokta ka raksabaji kenubosa longjema akümtsüsa tensa mapang kati bentsür arutsü, saka shirnoki iba mapa nungji pei jurila meyong amai kanga shioka yia tali-tapong jembidir/inyakdir, sobaliba aser mimchir libaliro yimya dak mapetba talila inyakdir, pa/la atemabo kangasa tansutsü/ayatai asütsü, kechiyong iba longjemba temoatsüji pa/la-bo magishitsü...!!! Anungji kechi ken o jembidir jembiba, kechi mapa inyakdir inyakaka, aseni jembiba aser inyakbaji asen dangi meyipa marutsüsa, kanga dang arok-aroka shisadanger dang jembitsüla aser inyaktsüla. "Shibaisa kangla tudir pa idakji tsüktsü; aser shibai lung mezüdir aji pa dangi meyiptsü" (A.Shin-26:27). Atangji, aseni atuba kangla nungji kenubo asena asongtsü aser aseni asoba/mesangba sang nungji kenubo asena ashitsü/apotsüsa tensa mapangi bentsür arutsü. Atangji, shirnoki koker ta ser taochi maket inyaker, ashiko parnok daka kenubo iba kasaji inyaktsüsa tensa mapangi bentsür arutsü. Yisu apuba aonung-to Peter-i nisünga ka tenarong leptoktsü, iba mapang-to Yisu-i Peter dang, "Ne nok pei alidak tanaben yuang, kechiaser shiri nok amshidir parnoka nok agi samatsü" (Mathi-26:52). Atangji shiri prangpong/injang amshia tangar tepseter, parnoka prangpong/injang agi tepsettsü, shiri tangar dak teka sangshir parnok daka tangari teka sangshitsü, shiri tangar dak taochi maket tashiyim mapa inyakdir, parnok daka yamajisa inyaktsüsa tensa mapangi bentsür arutsü. Shirnoki tarutsü tia indang meshisadangi o tulu-lu jembir aser taochi maket tashiyim inyaker, ashiko pa/la daka, mesura par chirnur aser semchisemnur daka yamaji inyaktsüsa tensa mapangi bentsür arutsü...!!! Atangji koba linük nung telongjem aser temeimtep lidir, idakji yimchi-yimjung, azükaro aser terenlok alitsü. Iba ama linük nungjagi alima lenir watsü wabong lanur tajung sotettsü aser adoktsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jantar Mantar, New Delhi nung Khristantemi longkak ait



January 21, 2023 nü Jantar Mantar, New Delhi nung tetsür organization balala nungi Khristantemi longkak aيتدang tangokba noksa nung angur.

New Delhi, Aenjeti/January 25 (Agencies): India linük yimtiba, New Delhi nung Arogo organization balala nungi Khristantem adenshir Centre sorkar dang Chhattisgarh state nung tanurtem aser tetsürtem kümzüksü takhangba agüja longkak ait.

January 21, 2023 nü Jantar Mantar, New Delhi nung organizations 15 nungi tetsür noklang aika adenshir tawa Chhattisgarh state kübok Narayanpur aser Kondagaon district na nung yimtsüing aika nung Khristantem amakba aija longkak ait.

Tang district ana kübok yimtsüing ter shi nungi mashisa tetsürtem, tanurtem aser tantsür-tamburtem densema tribal nisung 1,000 dak tema jenshiogo.

Khristantemi pei akhi tribal yimsü toktsür aser tribal nisungtem Khristan yimsü dangi meyipdaksür, ta aija Khristantem amak aser yim kar nungbo Khristantem meindok. Chhattisgarh nung tribal

Khristan tetsür anabo yimjak nung mangsa anir senzua liasü. Jantar Mantar, Delhi nung longkak aيتدertemi ozülu balala amer longkak ait.

"Tetsür aser tanurtem anema inyakba anenang" aser "Tribal Khristantem anema inyakba anenang," ta parnoki ozülu amer liasü.

"Rara aliba mapang nung takoksa tamajungba angurtemji tanur aser tetsürtem lir," ta taoba mapang Delhi Minority Commission nung züngsem, Sister Anastasia Gill-i ashi.

"Kodang tetsür aser tanurtem melung yirutsüdir loktiliba ajak timtemer," ta lai ashi.

"Secular aser tamangba yimsü telok balala nungi tetsürtemi tribal Khristantem anema inyakba aser Tenla kitem den ki raksatsüba tatalokbatem aitsür," ta lai metetdaksü.

Osangbener den jembidang Unity in Compassion nung General Secretary, Minakshi Singh-i, "Telemsa adokdaksüba teloktemi yimtenren nung

tajangzük angutsü nükjidong nung tensa raksatsür," ta metetdaksü.

Tetsür organization ka nungi Gayatri Devi-i, "Kodang tetsürtem aser tanurtem melung yirutsüdir loktiliba ajak timtemer, anungji state nung tang tensa azüoktsü atema ajak longjemtsü nüngdak," ta ashi.

Chhattisgarh nung talisa tribal nisungtem aliba tesemtem nung akhi tribal yimsü toktsür Khrista agizüker Khristantem anema inyaker aser Khristantem dang akhi yimsü dangi meyiptsü ajungshir. Ajisüaka temeden atema inyaker tetsürtemi ashiba agi, Khristantem anema inyakba ya talisa Hindu nationalist tangatetba ajanga lir aser yimtenren lenirtem den organization kari ajungshia Khristantem anema inyaker.

Tesüiba küm pezü tashi Chhattisgarh nung Congress sorkar lir; Congress ya secular party ka süaka state police-i Khristantem anema inyakba ya menokdangteter.

ANOGO ABEN TSÜNGREM DEN

Talangi atuba

"Aser pai ni Tanela nung tenem tulu talang kati anir atu..."

J. Adok 21:10

Iba ama mapang nung asenoki tebilemba balala aika adoker. Alima nung mapa tulu adoka temelenshi adoker. Kijaji kodanga yareta makümer. Aji oda liaka mapang ajak nung tebilemstü tulutibaji kija takümüji lir. Iba dang tali ajak metetsang kodaker Tebui nisung ka kisüing yimsüsür inyakba ama telok dak meinyaker. Meimchir Tsüngrem mesükba nung yanglu nungji, petinu tulutibajia meimchir dang nungi tilaba lir. Ajemalutiba tamanger kajia orion aser pleaides yanglusang senti züi Kalvary kangki nung alizük nung pa/laji senti lir! Teti dang repranga aliba Tsüngrem tenükji kija taküm shia repranga nüka lir ta tangatetba asenoki iba küm tasen tenzükdi.

Khristan ka ama tanü tensa terenlok ajak asenoki tenem kolak nungi reprangtsüla. Asenoki temejungket nung noktak nung dang talang nung aliba angutsü. Ali telemok nung mener alima tebur tajungji mangutsü. Ajungket nung mangdang angur. Asenoki lenden tuluba aser metong talangba nguner asenok tenem temejong nung noktaksüla. Yohan dang Tasen Yirusalem sayutsü atema Pa tenem tulu talang kati anir atu. Ibai masüidang Pa tzüyim küm nung notaker Tsüyim tarok nungji adokba shiruru ngua liasü (J.ADOK 13:1). Tanüa asenoki tawa- tanü lima nungji adokba shiruru aika angur, aser ishikatidang "Tasen Yirusalemji" anüing nungi aluba angur! Aika teküpboklen Tsüyim kümbang nung alir. Idakji tepuatsü aika dang lir. Idakji TV aser radio nung inyakerem alitsü. Anungji idakji anogo shia osang kaket adoker. Magazinitem adoker. Idakji lemanng nung sensakasenba aser business alitsü.

Khristar nübur alima tzüyim jenjanga alitsüba kodanga masü. Asenoki tenem kolakji reprang, shidakba tangatetba nung rangloksüla, shidakba tangatetba bushitsüla. Asenok tensa tatalokbatemji ain kar shin o den medemdanga, Tanela Temeshi tenük ajanga, Tsüngremer nükjidong aser Khristai tatem nung takok anguba nung rangloker angatetsüla. Asen mapang nung tzüyim nungi adokba shirurtem jaki memeteti "Tasen Yirusalem" asoshi terenemba akar. Tatemsa Kibubai takok angutsüba kuli asür.

Saka asenoki anogo shia taküm nung iba mangdangji koda ayutsü ? Asenoki Laishiba anasa alitsüla. Asenoki Tanela jashidaksüba mapa, aser telung nung pa kuli asüba anema kümdangtsüla. Tanela Temeshi dak metaloker asenoki küm tasen terenemba lemtetsüla.

Asenoki küm tasen nung item tezüngzüktepba Kibuba den yanglura iba tetezü mejembitetba temoatsütem angutsü. Ni anogo shia sarasadem nung minute semer dak tajemba magütsütsü. Ni hopta shia nisung ka dangbosa Kibuba indang kuli asütsü. Ni anogo shia Tejen aser Tasen Lai nungi maneni azüngtsü. Ni kü taküm nung Yisu melen kecha lemanng meshimtsü. Asenoki iba küm tepiyong lira, iba jaki tesünep teimla kuli asütsü.

Assam nung police-i survey agiba anentsü Khristantemi akhanger

January 25, 2023: Northeast India nung aliba Assam state nung Khristan telok kati police-i Khristantem, Arogotem, Arogoi lapokba school densema institution balala indang survey agiba ya tangsa anentsü atema tetuyuba agütsütsüla, ta takhangba agütsü.

Golaghat district nung United Christian Forum (UCF)-i January 20, 2023 nü shidi ka ajanga Assam Chief Minister, Himanta Biswa Sarma dang, district police-i Khristantem amokmerena inyakba mapa ya tangsa anentsü atema tetuyuba agüjang, ta mepishi.

Ajisüaka police-ibo parnoki Khristantem anema survey magir, ta shiogo.

Osangbenertem den jembidang Golaghat district nung deputy superintendent of police, Dipak Tamuly-i,

"Khristantem mesüra Arogotem anema survey kecha magir," ta metetdaksü.

United Christian Fellowship-i Chief Minister dangi züluba shidi nungji Tir, Jiden Aind aser genaral secretary, Toppo nati sign süa lir.

Parnoki ashiba agi, police ketdangser kari Arogotem aser Arogo lenirtem anema bushisüingdang aser district nung tangartem Khristan yimsü dangi meyipdaksür ta tai tonglokja bushisüingdangdar. "State tesem ajaklen iba ama Khristantem anema bushisüingdangba osang aika lir," ta Chief Minister dangi züluba shidi nungji shia lir.

"January 2, 2023 anogo nungi tenzuka Khristantem anema bushisüingdang; Khristantem ki semdang aser phone nung message yokba mita repranger, aser ibaji ajanga Golaghat nung Khristantem

tsübur mesüra ratamatar," ta shidi nungji shia lir.

"Anungji onoki nü (CM) dang yimlibilema tiyongtsüi aita ibaji nokdangtsü akhanger. Yimjung meimertem aser lokti tenzükertem ama onoki (Khristantem) nü dang linük temzüng nung nangzuka alibatem inyaksü mepishir," ta shidi nung shia lir.

January 24, 2023 nü osangbener den jembidang UCF Tir, Jiden Aind-i, "Police-i osangtsüsang balala asüingdangba aser data bendenba ajanga Khristantem tsübur," ta ashi.

Police-isa Brahmaputra ayong nung aliba Majuli asetkong nung Khristantem amokmerener aser Arogo dak sendakba osangtem asüingdang.

Assam Christian Forum nung otongdar, Allen Brooks-i, iba ama Khristantem

amokmerenba ya state tesem ajaklen, talisa yimtsüingtem nung ataloker, ta metetdaksü.

"Yaküm December 23 nü chief minister-i onok dang pai aniba sorkari Khristantem amokmerenba nokdangtsü, ta nangzuka liasü saka maneni ataloker," ta pai ashi.

"Onoki Khristan telok ajak dang onok den tongtepratepa alitsü mepishir," ta pai mepishi.

Brooks-i ashiba agi, Chief Minister nem agütsüba UCF temepishiba shidi ya state nung Khristantem jashiba temaitsü lir, ta ashiba den külemi Khristantem dang longjemer nokdaksü aser longjemer inyaksü ayongzük.

"Tang asenoki telongjem nüngdaker. Onoki Khristan telok ajak dang onok den tongtepratepa alitsü mepishir. Ibaji ajanga onoki nenok den amalitepa inyaktetsü aser longjemer nokdaksü atema

achaayangtetsü," ta paisa shisem.

Chief minister, Sarma ya Hindu pusemba Bharatiya Janata Party nungi lir aser paibo, onoki Khristantem anema survey aginüa mali, ta shiogo.

Yaküm December 16 nü police department-i sangdong ka ajanga tetuyuba ka agütsüba dak sendakba nung tasüingdangba ka langzüdang Chief Minister, Sarma-i, "Police-i inyakba nungji ni densema mali," ta metetdakja liasü.

Police department sangdong nungji Assam kübok district ajak nung December 22, 2023 tashi nungbo Khristantem indang survey agibaji renemtsüla, ta tuyua liasü.

Nütsüing million 31 aliba state, Assam nung Khristantembo shilem 3.74 dang lir.

AO OSHI ANGAZÜKDAK:

TANÜ ANGAZÜKTSÜBA OJANG



Orenlem

(adv) Oren tapu balala kuma lemsaba (kinds of sentence)

*Otsü züludang orenlem benteta amshitsü kanga tongtibang lir.

Orensa

(n) oren yayim nung rasaba (exposition of words)

* Orensa agi ojang tetezü tajungba angatetdaksür.

OLONG PAITEP # 6410

15x15 crossword grid with numbers 1-19 indicating starting positions for words.

TIPIEN

- 2. Teburtemi tejak nung awaba - (8)
6. T _ _ _ em - (3)
8. Tzük ayudak - (3)
9. Nungdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6409 TELANGZÜBA

TIPIEN :

- 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabilli, 11. Among, 12. Miim, 13. Anem.



ALOKBAI ELECTION TERA KAR RAKTETTSÜR :

- Kidangsür : Hai Alokba ya anepongi kechi asür.
Alokba : Aya... ah, election anasa arur ah toh! Lanurtemi yi aser mozü meshirji, aji bener aotsüba asameyangeraja yah!
Kidangsür : Aya ya ya... Mozü Oyi ah ah... Candidate temi item ajakji agütsür ah nah?
Alokba : Aito... Aji magütsüra youth temi vote magütsütsü ah toh....
Kidangsür : Süra aji kechi nung bener aotsü, aser kong ayutsü.
Alokba : Aiiii ajak nenok dang ashitsü masuar... Yim tonger ki kar nung ayutsü. athi....
Kidangsür : Ohoooo... Takumbo watsü tem kümshitsü... Kar tular akümtsü, kar meim mozü aser yi agi tepsettsü, yabo asenok khen saksalemstü mapang masü noh!
Alokba : Nenok kümshira, candidate tema tajangzük asütsü.

Lilir : Aienla Ao

R-Day amungtsü lia Assam nung security akangshir

Guwahati, Aenjeti/January 25 (Agencies): Brehostibarnü 74buba Republic Day amungtsü lia Assam police-i state ajunga nung security akangshiogo.

District ajak nung Assam police tekolaktem dang telungpurtem inyakim meita atatsü atema tetuyuba agütsüogo.

Nagaland aser Arunachal Pradesh den Assam arrtsü nung security akangshiogo aser talisa Asunachal kübok Changlang aser Nagaland kübok Mon district koba Myanmar den arrtsü nung lir iba district ana den arrtsü nung sepaitem tali kümshia lir.

Government Railway Police (GRP) aser Railway Protection Force (RPF) patrolling tali kümogo, ajita asünungdang ozüing raksartemi train mesüra railway track tem nung sang sua metoktsütettsü.

National highway, aputem aser tongtibang tesem tem nung meitkar maparen tali

ajungketogo.

Assam yimtiba Guwahati-i aiba aser atokba tesemtem ajak kanga junga meita atadar aser passenger bus tem densema gari ajak kanga junga asadangdar.

Kasa mapang nung Guwahati kübok Khanapara veterinary college playground, kong Central Republic Day amungtsü lir iba tesem nung security kanga akangshiogo. Iba tesem nung Assam chief minister Himanta Biswa Sarma-i January 26 nü 9:00 ako nung linük wako atsükettsü.

Indian Army bomb disposal squad den sniffer dog aser metal detector amshia Khanapara nung Republic Day amungtsü aliba tesem Mongolbarnü kanga junga meitaogo.

Temetettsü kaji United Liberation Front of Asom (ULFA-Independent) aser National Socialist Council of Nagaland/Government of the People's Republic of Nagaland

(GRPN) nati January 26 nü general strike ka ayongzükba den nüburtem dang Republic Day nung shilem magitsü atema ashiba sülen security akangshitsü atema jenjang tapet agidar.

Mongolbarnü ULFA-Independent aser NSCN/GRPN nati külem sangdong ka ajanga, January 26 nü anepdang 12:00 ako nungi nikongtsütsü 6:00 ako tashi inyaksangshi kecha masütsü atema ayongzükogo.

ULFA-I-i Republic Day sentong nung shilem magitsü atema ayongzükba indang jembiba mapang Assam DGP Bhaskar Jyoti Mahanta-i, "onok teti ama kanga kümshia lir aser takoktashi jenjang ajak agidar. Hau teti ama Assam nung tetsükdaksü kar lir, saka onoki jenjang tepet agidar ta bilemer," ta ashi.

Assam kübok tesem balala nung 74buba Republic Day amungtsü atema renemshiba tatembang ka dangi arudar.

BJP den menden melemsateptsü: Pradyot Debbarma



Tripura royal scion aser TIPRA party mendenbuba Pradyot Debbarma

atema tezüluba nung tenangzükba ka mangu tashi TIPRA pur party kecha dena melungjemtsü ta ni shia aruogo," ta ashi

"Kasa mapang nung onok BJP den longjemtsü atema inyaktepdar ta metetdaksüba osang ya tai," ta Pradyot Debbarma-i ashi.

Tripura assembly elections nung kija tokteptsü atema sangdongba sülen anogo ka lir TIPRA party ya ministry of home affairs (MHA)-i, par party-i "Greater Tipraland" akhangba ken o sensak asemstü atema Delhi-i jaoka liasü.

MHA ketdangsürtemi TIPRA mendenbuba Pradyot Debbarma dangi call asü aser par party-i "Greater Tipraland" atema akhangba ken o sensak asemstü atema pa Delhi-i jaoka liasü.

Pradyot Debbarma den külemi TIPRA tir Bijoy Kumar Hrangkhal, party lenir tejen Animesh Debbarma, Chitta Debbarma aser Mevar Kumar Jamatia nunger Delhi semdangtsü renema lir.

Agartala, Aenjeti/January 25 (Agencies): Tripura indang royal scion aser TIPRA party mendenbuba Pradyot Debbarma-i, Centre-i "Greater Tipraland" ken o kümshia süra par party BJP den longjemer taruba election nung toktsüptsü ta osang balala adokba ya shitak masü ta shiogo.

Northeast Now den sensaksemba mapang TIPRA tekolakba Pradyot Debbarma-

i, tang tashi nung Tripura assembly elections nung longjemer tokteptsü atema party kecha dena tenangzüktepba yanglua mali, ta ashi.

"Hau 'Greater Tipraland' ken o sensak asemstü atema MHA-i onok jaokogo. Ajisüaka onok party tanga den longjemer tokteptsü atema kecha tebilemba mali," ta Pradyot Debbarma-isa ashi.

Pai, "'Greater Tipraland'

Meghalaya elections: TMC-i candidate list tanabuba sangdongogo

Shillong, Aenjeti/January 25 (Agencies): Trinamool Congress (TMC) Meghalaya unit-i Bodhbarnü (January 25), state nung taruba assembly election atema candidate tem list tanabuba sangdongogo.

Meghalaya TMC indang candidate list tanabuba nung constituency asem nungi candidate tem tenüing densema lir.

Meghalaya TMC-i, Raliang (ST) nungi Robinus Syngkon, Nongpoh (ST) nungi Longsing Bey aser Mawlai (ST) nungi Stepbourne Kupar Ryndem

yoktsü. January 6 nü Meghalaya TMC-i constituency 52 nungi candidate tem tenüing sangdonga liasü.

Taoba Meghalaya chief minister Mukul Sangma, Songsak aser Tikrikilla ta menden ana nungi tokteptsü.

Mukul Sangma kinungtsü Dikkanchi D Shira, Mahendraganj constituency nungi aser par jala Miani D Shira Ampati constituency nungi tokteptsü aser pa tenu tanobusang Zenith Sangma,

Rangsakona nungi tokteptsü.

Meghalaya TMC tir Charles Pyngrope Nongthymmai constituency nungi tokteptsü aser kasa mapang nung party vice-president aser sitting MLA George B Lyngdoh, Umroi nungi tokteptsü.

Taoba MLA SG Eastamur Mominin, Phulbari constituency nungi tokteptsü.

Meghalaya legislative assembly nung menden 60 atema election ya February 27 nü agitsü renema lir aser vote tem March 2 nü azüingtsü.



On 10th January 2023, a group of NDPP Supporter (Kijung Lanur) comprising of more than 200 young and energetic people of Yaongyimsen Village under 22nd Arkakong Constituency held a joint meeting and resolved the following decision.

1. The members acknowledge the present MLA & Advisor Shri. Imnatiba for his tireless and selfless service towards the welfare of the constituency and the state in general.
2. The members resolved and reform to work whole heartedly with firm determination for Shri. Imnatiba, the present MLA & Advisor of 22nd Arkakong A/C in the forth coming State General Assembly Election for progress and solidity of the Arkakong Constituency.
3. The members further extend its best wishes and prayer.

Malawi nung saksü-pokshi agi asür nisung 1,000 alemogo

Lilongwe, Aenjeti/January 25 (Agencies): Malawi nung saksü-pokshi agi asür nisung 1,000 dak tema kumogo aser iba tashidak wara agi nisung 30,621 menepa lir, ta health minister Khumbize Chiponda-i ashi.

Nisung asüba osang Mongulbarnü sangdongba ya tetsübotsü alizüing ka tongtetba lir, koba 2001 aser 2002 tsüngta nisung 968 asüba alemogo, ta World Health Organization (WHO) ajanga ashi.

Bodhbarnü Chiponda-i nüburttem dang saksü-pokshi wara agi asürtem tasümgang kanga kumdanga amshitsü ayongzüka liasü.

"Saksü-pokshi agi asürtem ya kinunger temi temang shidoktsü aser tatembang chiyongba renemer aser item chiyongba sülen saksü-pokshi ya tenzüker," ta lai ashi.

Chiponda-isa nüburttem dang chlorine aser plastic body bag tem amshitsü ajungshia

Asürtem ya timba Lilongwe aser Blantyre yimtitem nungi lir, kong iba wara prokshia aoba azüoktsü meranga school tem menua shibangba tawa lapokba sülen tanurtem oa dena liasü.

Africa south tsütsü November nungi March ita tsüngta tzunglu aruba mapang küm shia saksü-pokshi wara yagi kongshir aser iba mapang nisung 100 jungnüa asür. Saka 2022 küm benjong mapang aser iba sülen timba akum.

Malawi nung immunisation campaign tali ulushitsü atema 2022 küm November ita United Nations nungi oral cholera vaccine doses million asem jungnüa agüja liasü, saka cases maneni timba akum.

Health ministry odongtar Adrian Chikembe-i doses ajak amshiogo, ta ashi.

Alima nung cholera vaccine yanglur ka kisüing aliba ajanga iba mozü angutsü kanga tasak kumdaktsür aser

iba mozü nüngdaka aliba linüktem tsüngta toktepdaktsür, ta pai ashi.

Cholera yagi saksüa tepok odaktsür aser iba ya bacterium nungi menar, koba chiyongtsü mesüra tzü tamajung nungi menatapa aor.

Malawi Health Equity Network indang director George Jobe-i ashiba agi, online nung osang tiazü prokshiba ajanga tensa tali tamajungba kumdaktsür.

"Nisung timbai cholera aliba mamanger. Ano tamangba yimsü kari par züngsemtem shiranga alir mozü kidangi aotsü memelar," ta pai ashi.

TZü mopung melenba den ano maka-mait aser rara ajanga alima nung cholera poktetba tali akumer, ta WHO-i September ita tekumdangtsü shia liasü.

Küm shia iba tasidak yagi nisung million 1.3 aser million pezü tsüngta dak kongshir aser 143,000 tashi asür.

CHUMUKEDIMA ONGPANGKONG SENSO TELONGJEM

SANGDONGER

Koba lottery ticket (COST) C. Hall atema saidagi, ibai January 23 nung result adoktsü liasü, saka koda masüba timtem kar ajanga 1st May 223 nungang result agütsütsü sangdonger.

ALI AYOKTSÜ LIR

Foothill Road nungi 2 minutes
Hozukhe Village - Rs. 25 per sq.ft.
Ph. No : 8798384967 / 2859001052

REJOINDER

This rejoinder is issued with regard to a publication that has been published in the dailies on the 24th January 2023, with the caption "YAONGYIMSEN VILLAGE- FORMER & PRESENT OFFICE BEARERS OF NDPP 22 ARKAKONG AC EXTENDING SUPPORT TO SHRI. NUKLUTOSHI." We the following undermentioned members of Yaongyimsen Village would like to clarify that the declaration is totally false and misleading, it has been published without the consent of the undermentioned individuals. That, we vehemently condemn the 22 Arkakong AC, Yaongyimsen Village supporters of Ex-Minister Mr. Nuklutoshi for falsely dragging our names to further their political agendas and misleading the public with fabricated information. Their unwarranted act of treachery towards the innocent Village members is highly condemnable and will have befitting ramifications.

We, the undermentioned members hereby declare that we are very much intact and standing firm in support of Mr. Imnatiba, MLA 22 A/C Arkakong for the upcoming General Election 2023.

- | | |
|-------------------|------------------|
| 1. Takosangba | 22. Bendangonen |
| 2. Tianaro | 23. Talikaba |
| 3. Moasangla | 24. Arenkala |
| 4. Chubalemla | 25. Imnajungla |
| 5. Imkongtemjen | 26. Sentichuba |
| 6. Bendangsunep | 27. Limainla |
| 7. Sosangba | 28. Taliangla |
| 8. Imlimanen | 29. Tinulemba |
| 9. Imsuinla | 30. Moasunep |
| 10. Imtichuba | 31. Meyitizung |
| 11. Nungsangtula | 32. Putisangla |
| 12. Limameren | 33. Tsuknungkala |
| 13. Chubawati | 34. Tiakumzuk |
| 14. Takanungsang | 35. Onenkaba |
| 15. Limasanen | 36. Moazungba |
| 16. Aoyanger | 37. Takullila |
| 17. Imtiwapang | 38. Tianungsang |
| 18. Imtimar | 39. Sentirenla |
| 19. O. Matsung | 40. Imenukshi |
| 20. Imtisunep | 41. Nushimenla |
| 21. Tsungrosongba | 42. Temsuyangla |

New Zealand PM ama Hipkins tezüngzüktep agiogo

Wellington, Aenjeti/January 25 (Agencies): Taoba hopta Jacinda Ardern ajungbena mapa nungi anenba sülen Labour party lenir Chris Hipkins ya New Zealand indang ato kilonser tassenba ama tezüngzüktep agiogo.

Hipkins-i iba mapa ya linük yimtiba, Wellington nung New Zealand indang governor-general aser United Kingdom indang King Charles melen arurtem lia agizüka liasü. King Charles ya New Zealand indang head of state lir.

Deputy prime minister ama Carmel Sepuloni kasa mapang tezüngzüktep agia liasü, shiba Pacific Islander nungi jakzükeri iba shilem agir mezüngbuba alitsü.

"Kü takum nung ibai maongka tulutiba alitsü. Tayongzükbatem ajanga ni tashi itshir aser jangratemer," ta Hipkins-i iba sülen ashi.

Arishi küm 44 tain Hipkins ya taoba mapang linük nung COVID-19 den raraba nung yutsür ta sangdongba sülen shima liasü.

Ardern tatemsaba ayazüka aodang Parliament kima nisung noklang aika adenshia alirtemi teka malokja pela agizük.

Lai parliament züngsem ajak dak azüit aser aika temolung shiranga liasü aser Government House-i ao, kong lai Governor General Cindy Kiro nem la mapa nungi anenba tezüluba nung agüja liasü.

Ardern ya ato kilonser ama 2017 küm mezüing shimtet aser iba sülen 2020 küm kümsük tanabuba asoshi ayong-ayonga takok ngua liasü.

Ajisüaka osettsüset nung jenjang tali akumba agi lar centre-left sorkar küm ana timtema aru aser opposition tashi itshia akum.

Ato kilonser ka ama Hipkins-i mezüngbuba cabinet senden amenba sülen osangbener den jembidang par policy agenda nung nüburttem takum alitsü asoshi senotsü indokba tiyong südaktsütsü, ta shia liasü.

Hipkins dang 'Chippy' ta ajar aser COVID-19 kanga junga azüokba atema New Zealand nungeri pa kanga junga meteta akum.



Jan 25, 2023 : Peru yimtiba, Lima nung sorkar anema longkak aiter temi police den raratepba noksa nung angur. Longkak aiter temi Tir Dina Boluarte mapa nungi anentsü, tir menden nungi atsüngdoker alisang Pedro Castillo tepuokdak nungi chiochtsü, tekeratiba nung election agitsü aser longkak aيتدang tepseter asoshi obendang agütsütsü akhanger.

Suryakumar nem ICC Men's T20I Cricketer of the Year naroküm agütsü



New Delhi, Aenjeti/January 25 (Agencies): T20 asaya nung 2022 küm tepeyong kanga junga asayaba sülen India nunger middle-order batter Suryakumar Yadav nem Bodhbarnü International Cricket Council (ICC)-i Men's T20I Cricketer of the Year naroküm agütsüogo.

Suryakumar ya India nunger batter tem rongnung küm ka nung run 1000 dak tema yangluba asayar aküm. Pai taoba küm Pakistan nunger asayar Mohammad Rizwan atsingtoka ICC T20I rankings nung No.1 asayar aküm.

Suryakuma-i taoba küm T20I asaya 31 nung run 1164 aser pa indang average ji 46.56

liasü. Maneni 2022 küm pa indang strike rate 187.43 liasü. 2022 season nung otsü tasen kar yanglua Suryakumar ya asayatem rongnung run timtiba yangluba asayar liasü. Pai taoba küm six 68 azük, koba küm ka nung asayar kati six timtiba azükba liasü.

"Kanga jangradema bilemer aser 2022 küm ya ni atema küm tajung ka liasü. Ni asaya kar nung jangradema asayaogo aser ajak dang tajungtibaji linük atema mezüngbuba century yangluba ya liasü, kechiyong mezüngbuba century ya kanga balaka asür. Tarutsü nunga junga asaya aotsü imla atar," ta Suryakumar-i Men's T20I Cricketer of the Year award

anguba sülen ashi.

Arishi küm 32 tain asayar yagi taoba küm century ana aser half century teku züka liasü. Maneni pa ya Australia nung T20 World Cup 2022 nung Rohit Sharma-i aniba India team atema tongtimbang asayar ka liasü. World Cup nung pai asaya trok nung half-century asem azük aser iba asayamung nung pa indang strike rate 189.68 liasü.

T20 World Cup nung kanga takok ngua asayaba sülen Suryakumar-i maneni kanga junga asaya New Zealand den T20 asayaba mapang century ka züka liasü. T20 World Cup sülen pa indang career nung rating point (890) timba nguteta pa ICC Men's T20I Player Rankings nung temaba jenjangi atu.

Suryakumar-i pa indang T20I career nung century asem aser half-century 13 züka lir. Mumbai Indians nungi asayar yagi India tenüng nungi asayaba mapang T20 nung run 1578 yanglua lir. Suryakumar ya 2021 küm England den Narendra Modi Stadium nung asayaba mapang mezüngbuba India team nungi asaya liasü.

Mohammed Siraj world number one ODI bowler kümogo



Dubai, Aenjeti/January 25 (Agencies): Bodhbarnü sangdongba ODI bowlers ranking nung India nunger pacer Mohammed Siraj temaba jenjangi tuogo.

Siraj-i New Zealand nunger asayar Trent Boult aser Australia nunger asayar Josh Hazlewood na ajateta tang mezüngbuba ODI bowler tem rongnung temaba jenjangi tuogo.

Taoba ita 12 kanga junga asayaba dang masü Siraj-i iba ita tetenzüklen India nung Sri Lanka aser New Zealand den asayaba mapang kanga junga asayaba ajanga pa tawa kanga kara renlokyonga aoba sayur.

Sri Lanka den asayaba mapang Siraj-i wicket teku agia pa iba asayamung nung wicket timtiba asayar liasü aser iba sülen Zew Zealand den iba hopta tembangba asayamung nunga pai asaya mezüngbuba nung wicket pezü agia liasü.

Siraj-i rating point 729 nguteta ODI bowler rankings nung temaba jenjang tongtetogo aser pa point ana agi dang Australia nunger bowler Hazlewood dang nungi timba lir.

India nunger bowler tem rongnungi Mohammed Shami-a jenjang 11 tejakdangi tua tang 32buba nung lir aser India o New Zealand na tsüngda asayamung tembangba sülen

batter rankings nunga temelenshi adokogo.

ODI batter rankings nung Pakistan captain Babar Azam maneni temaba jenjang nung lir, saka tang top ten nung India nunger asayar asem tashi lir.

New Zealand den kidang asayaba mapang double hundred ka aser century ka ta yangluba sülen opener Shubman Gill jenjang 20 tejakdangi tua tang trokbuba tongtetogo.

Gill-i Virat Kohli ajatetogo, shiba New Zealand den asayaba mapang junga masayatetba sülen jenjang tenetbubai asepzüka aluogo. Kasa mapang nung Rohit-a jenjang ana tejakdangi tua tang tibuba nung lir. Pai New Zealand den Indore nung asayaba mapang century ka züka liasü.

Maneni ICC ODI rankings nung India team temaba jenjangi tuogo. Mongolbarnü New Zealand team 3-0 agi akokba sülen iba jenjang ajangetetogo.

India team-i tawa kanga junga asaya arudar aser parnok iba ita tetenzüklen Sri Lanka team-a 3-0 agi koka liasü.

Anogo asem tejakdang tanabuba ODI nung takok anguba sülen India team-i temaba jenjang nung aliba England team ajateta liasü.

Australian Open: Djokovic, Paul & Sabalenka semifinal-i iogo

Melbourne, Aenjeti/January 25 (Agencies): Bodhbarnü Australia Open tebur kija asaya nung Novak Djokovic-i fifth seed asayar Andrey Rublev 6-1 6-2 6-4 agi ayong ayonga koka semi-finals tongtetogo.

Pai taküm iba asayamung kokra Grand Slam 22buba aser Australia Open 10buba akokba asütsü.

Iba asaya akokba sülen Djokovic-i tang agi 44benbuba Grand Slams semifinal tongtetogo aser iba ajanga pa Rafa Nadal dang nungi trok agi timba aser Roger Federer asaya ana agi dang memenepe kümogo.

Tebur asaya nungsa Tommy Paul-i quarter final asaya nung Ben Shelton tsükdakja tang mezüngbuba Grand Slam semifinal ka tongtetogo.

Rod Laver Arena nung iba asaya ya Paul-i 7-6 (8/6), 6-3, 5-7, 6-4 agi koka liasü.

Pa taruba asaya Serbia

nunger asayar Novak Djokovic den asayatsü.

Australian Open nung America nunger asayatem rongnungi Andy Roddick-i 2009 küm semifinal tonga asayaba sülen Paul ya tanabuba asayar kümogo.

Iba asaya akokba sülen arishi küm 25 tain asayar yagi 14benbuba nung tang mezüngbuba Grand Slam semifinal ka tongtetogo.

Kasa asayamung tetsür kija asaya nung Aryna Sabalenka-i Bodhbarnü Donna Vekic madak takok ngua semi-final-i iogo.

Rod Laver Arena nung lai iba asaya ya minute 49 nung 6-3, 6-2 agi koka liasü.

Sabalenka semi-final nung Poland tsür Magda Linette den asayatsü. Lai tang tashi nung Grand Slam final ka nung danga asayadanga mali.

Tetsür kija asaya tanga ka nung unseeded asayar Magda

Linette-i taoba mapang world number one asayar Karolina Pliskova 6-3, 7-5 agi koka tang mezüngbuba Grand Slam semifinal semifinal kati iogo.

Iba asayamung nung Linette-i number one asayar Iga Swiatek-a tsükdaktsüogo aser la Honibarnü semifinal nung Aryna Sabalenka den asayatsü.

Kasa asayamung tarep temeyoktep asaya nung Sania Mirza aser Rohan Bopanna nati third seed tarep Desirae Krawczyk aser Neal Skupski na 7-6(5) 6-7(5) 10-6 agi koka semifinal tongtetogo.

Sania Mirza atema iba asayamung ya tatembangbuba Grand Slam asayamung asütsü aser takok ngutetra la asoshi Grand Slam title tenetbuba asütsü. Sania-i, February ita Dubai nung asayatsü aliba WTA event ya la asoshi tatembangbuba asayamung asütsü ta shiogo.

Nations League SF: Netherlands aser Croatia; Spain aser Italy asayatsü

Aenjeti/January 25, 2022 (Agencies): UEFA Nations League semifinals nung hosts Netherlands pur caoch tasenba Ronald Koeman lenisüba nung June 14 nü Rotterdam kübok De Kuip stadium nung Croatia den semifinals asayatsü.

Kasa mapang nung tanga semifinal asaya ka nung June 15 nü Enschede nung Spain aser European champion Italy na asayatsü.

UEFA Nations League semifinals atema fixture ya Bodhbarnü yanglua liasü.

Rotterdam nung final asaya aser Enschede nung tasembuba jenjang atema asaya ya June 18 nü asayatsü renema lir.

Taoba küm June nungi September ita tashi asayaba mapang top-tier Nations League group nung takok anguba sülen team pezü ya iba asayamung semifinal atema qualify süogo.

Asayamung koba küm ana nung ken asayar, iba asayamung ta taoba mapang 2019 küm Portugal-i aser 2021 küm France-i koka lir.

Nations League semifinal nung asayatsü aliba team pezü ya 2024 European Championship atema five-team qualifying groups nung züngoksemtso. Item teloktem ya March ita nungi asaya tenzüksü aser November ita tembangtsü.

Indonesia Masters: Sen, Saina tanabuba round-i iogo

Jakarta, Aenjeti/January 25 (Agencies): India nunger badminton asayar Lakshya Sen aser Saina Nehwal nati tang asaya aliba Indonesia Masters Super 500 tournament nung Bodhbarnü tebur aser tetsür kija asaya mezüngbuba round nung pei tata asaya koka tanabuba round tongtetogo.

Sen, shiba season tasenba nung taoba hopta ana tsüngda Malaysia aser India Open nung junga masayateti tsükogo, pai iba asayamung mezüngbuba round nung Japan nunger asayar Kodai Naraoka, 21-12 21-11 agi

koka liasü.

Saina, shiba Indian Open nung tanabuba round tonga asayaogo, lai 21-15 17-21 21-15 agi Chinese Taipei tsür Pai Yu Po madak takok ngua pre-quarterfinals-i iogo.

Sen taruba asaya Malaysia nunger asayar Ng Tze Yong den asayatsü aser Saina, Zhang Yi Man aser Han Yue na asaya akoker den asayatsü.

Kasa mapang nung taoba mapang world No. 1 asayar Kidambi Srikanth 10-21 22-24 agi tamakok ngua asayamung nung tuguogo.

BILEMDANGANG

"Na kechi dak rangloker inyaker aji akümer."